



**ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎ**

Ո Ր Ո Շ ՈՒ Մ

3 մայիսի 2022 թվականի թիվ 174-Ա

ԹԻՎ ՀԳ-00048/22 ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Մրցակցության պաշտպանության հանձնաժողովը (այսուհետ նաև՝ **Հանձնաժողով**) 2022 թվականի մայիսի 3-ի նիստում, քննարկելով թիվ ՀԳ-00048/22 վարույթը կարճելու մասին հարցը,

Պ Ա Ր Զ Ե Ց

1. Վարույթի ընթացքի հակիրճ նկարագրությունը.

Հանձնաժողովը 2022 թվականի փետրվարի 8-ին «Ապարան Զուր» սահմանափակ պատասխանատվությամբ ընկերության կողմից տնտեսական մրցակցության բնագավառում իրավախախտման վերաբերյալ վարույթ հարուցելու մասին» թիվ 45-Ա որոշմամբ (այսուհետ նաև՝ **թիվ 45-Ա որոշում**) հարուցել է թիվ ՀԳ-00048/22 վարույթը (այսուհետ նաև՝ **Վարույթ**):

«Ապարան Զուր» սահմանափակ պատասխանատվությամբ ընկերությունը (այսուհետ նաև՝ **Ընկերություն**) թիվ 45-Ա որոշումն ստացել է 2022 թվականի մարտի 14-ին և 2022 թվականի մարտի 17-ին Հանձնաժողով է ներկայացրել Վարույթի վերաբերյալ գրավոր դիրքորոշում (այսուհետ նաև՝ **Դիրքորոշում**)՝ միաժամանակ խնդրելով երկարաձգել տեղեկատվություն ներկայացնելու ժամկետը:

Հանձնաժողովի նախագահի 2022 թվականի մարտի 22-ի թիվ ԳԳ-626 գրությամբ տեղեկատվություն ներկայացնելու ժամկետը երկարաձգվել է 2022 թվականի մարտի 23-ը ներառյալ:

2. Վարույթի հարուցման առիթի և հիմքի հակիրճ նկարագրությունը.

Վարույթը հարուցվել է Հանձնաժողովի լիազորությունների իրականացման ընթացքում Ընկերության կողմից առանց ջրօգտագործման թույլտվության և աղբյուրի ջրի

ձեռքբերման «Խմելու չգազավորված ջուր ԱՂԲՅՈՒՐ» շալցված ոչ գազավորված ջրեր արտադրելու և իրացնելու միջոցով հասարակության մոլորեցման դրսևորմամբ առերևույթ անբարեխիղճ մրցակցության հատկանիշներով:

3. Ընկերության դիրքորոշումը.

Ընկերությունը 2022 թվականի մարտի 17-ին ներկայացրած գրությամբ հայտնել է, որ Հանձնաժողովի 2020 թվականի փետրվարի 4-ի որոշումից հետո Ընկերության կողմից շալցվող ջրի պիտակի վրա «աղբյուրի ջուր» մակնշումը բացակայում է, նշվում է «Խմելու ջուր չգազավորված. Ապարանի կենտրոնական ջրամատակարարման ցանցի ջուր մաքրված, ֆիլտրված»: Ընկերությունը նաև հայտնել է, որ 2019 թվականի դեկտեմբերի 11-ից «Աղբյուր» ապրանքային նշանների իրավատերն է:

Ըստ Ընկերության՝ հաշիվ-ապրանքագրերում Ընկերությունն ապրանքի անվանումը նշում է՝ ըստ ապրանքային նշանի, այդպիսին առկա լինելու դեպքում, օրինակ «Ջուր ԱՂԲՅՈՒՐ», «Խմելու ջուր ԱՂԲՅՈՒՐ» և այլն:

4. Հանձնաժողովի կողմից պահանջված և ստացված փաստաթղթերը և այլ տեղեկատվությունը.

1) Հանձնաժողովը՝ Հանձնաժողովի նախագահի 2021 թվականի դեկտեմբերի 7-ի թիվ ԳԳ-3061 գրությամբ (այսուհետ նաև՝ **թիվ ԳԳ-3061 գրություն**), դիմել է Պետական եկամուտների կոմիտե (այսուհետ նաև՝ **ՊԵԿ**)՝ խնդրելով Հանձնաժողովին տրամադրել 2021 թվականի հունվարի 1-ից մինչև դեկտեմբերի 6-ն ընկած ժամանակահատվածում «հանքային ջրեր և չքաղցրացրած, չբուրավետացված գազավորված խմիչքներ» (ԱԴԳՏ 11.07.11) ապրանքային խմբին դասվող ապրանքների արտադրություն և «ջրեր, բնական կամ արհեստական հանքային ջուր և ըմպելիք (առանց շաքարի)» (ԱՏԳ ԱԱ 2201) ապրանքային խմբին դասվող ապրանքների ներմուծում իրականացրած տնտեսավարող սուբյեկտների ցանկը (անվանումը, կազմակերպատիրական ձևը, ՀՎՀՀ-ն, իրավաբանական հասցեն, գործունեության վայրը և այլն), ինչպես նաև վերջիններիս կողմից նույն ժամանակահատվածում բնական խմելու ջրի և մանկական սննդի համար նախատեսված խմելու ջրի իրացման ծավալների, իսկ անհնարինության դեպքում դուրս գրված բոլոր հաշվարկային փաստաթղթերի և ՀԴՄ կտրոնների միջոցով իրականացված գործարքների վերաբերյալ տեղեկատվություն:

ՊԵԿ-ը, ի պատասխան թիվ ԳԳ-3061 գրության, 2021 թվականի դեկտեմբերի 27-ի թիվ 01/71-6/82963 գրությամբ Հանձնաժողովին է տրամադրել 2021 թվականի հունվարի 1-ից մինչև դեկտեմբերի 6-ն ընկած ժամանակահատվածում ԱԴԳՏ 11.07.11 և ԱՏԳ ԱԱ 2201 ապրանքային խմբերին դասվող ապրանքների ներմուծում և արտադրություն իրականացրած տնտեսավարող սուբյեկտների և վերջիններիս կողմից դուրս գրված հաշվարկային փաստաթղթերի վերաբերյալ տեղեկատվությունը, իսկ 2022 թվականի հունվարի 12-ի գրությամբ Հանձնաժողովին է տրամադրել նույն ժամանակահատվածում

ԱԴԳՏ 11.07.11 և ԱՏԳ ԱԱ 2201 ապրանքային խմբերին դասվող ապրանքների արտադրություն և ներմուծում իրականացրած տնտեսավարող սուբյեկտների և վերջիններիս կողմից ՀԴՄ կտրոնների միջոցով կատարած գործարքների վերաբերյալ տեղեկատվությունը:

ՊԵԿ-ի կողմից տրամադրված՝ վերը նշված տեղեկատվության համաձայն՝ Ընկերությունը 2021 թվականի հունվարի 1-ից մինչև դեկտեմբերի 6-ն ընկած ժամանակահատվածում իրացրել է «խմելու չգազավորված ջուր ԱՂԲՅՈՒՐ» ապրանքը:

2) Հանձնաժողովը՝ Հանձնաժողովի նախագահի՝ 2021 թվականի դեկտեմբերի 28-ի գրությամբ, դիմել է Շրջակա միջավայրի նախարարություն (այսուհետ նաև՝ **Նախարարություն**)՝ խնդրելով տրամադրել տեղեկատվություն խմելու «բնական» և «աղբյուրի» (չգազավորված և ոչ հանքային) ջրերի ջրօգտագործման թույլտվություն ստացած տնտեսավարող սուբյեկտներին տրված ջրօգտագործման թույլտվությունների վերաբերյալ:

Նախարարության՝ 2022 թվականի հունվարի 10-ի թիվ 1/10.2.3/394 գրության ուսումնասիրությունից պարզվել է, որ Ընկերությունը չունի ջրօգտագործման թույլտվություն:

3) Հանձնաժողովի նախագահի 2022 թվականի փետրվարի 11-ի թիվ ԳԳ-274 գրությամբ Ընկերությունից պահանջվել է Հանձնաժողով ներկայացնել հետևյալ տեղեկատվությունը.

1. Ընկերության կողմից «աղբյուրի ջուր» բառերով մակնշված ապրանքների անվանացանկը և դրանցից յուրաքանչյուրի պիտակը կամ լուսանկարը, որը կպարունակի պիտակին առկա ողջ տեղեկատվությունը,

2. Ընկերության կողմից «խմելու չգազավորված ջուր ԱՂԲՅՈՒՐ» ապրանքի (այսուհետ նաև՝ **Ապրանք**), ինչպես նաև «աղբյուրի ջուր» բառերով մակնշված և շշակված չգազավորված այլ ջրերի իրացման սկզբնաժամկետների վերաբերյալ՝ նշելով ամսաթվերը,

3. Ընկերության կողմից 2020 և 2021 թվականներին Ապրանքի, ինչպես նաև «աղբյուրի ջուր» բառերով մակնշված և շշակված չգազավորված այլ ջրերի իրացման ծավալների (բնեղեն արտահայտությամբ) և դրանցից յուրաքանչյուրի իրացումից ստացված հասույթի չափերի վերաբերյալ՝ առանձնացված ըստ տարիների (ոչ ամբողջական տարի արտադրված լինելու դեպքում՝ ըստ ամիսների) և ըստ ապրանքների:

Ընկերությունը ներկայացրել է պահանջված տեղեկատվությունը և պիտակները: Պիտակների վրա առկա է հետևյալ տեղեկատվությունը. «խմելու ջուր չգազավորված. Ապրանքի կենտրոնական ջրամատակարարման ցանցի ջուր մաքրված, ֆիլտրված», իսկ պիտակների կենտրոնական հատվածում առկա է «ԱՂԲՅՈՒՐ» մակնշումը:

4) Դիրքորոշմանը կից ներկայացված հաշիվ-ապրանքագրերի համաձայն՝ որպես մատակարարվող ապրանք նշված է «խմելու չգազավորված ջուր ԱՂԲՅՈՒՐ» արտահայտությունը:

5) Մտավոր սեփականության գրասենյակի պաշտոնական կայքում (www.aipo.am) առկա և Ընկերության ներկայացրած տեղեկատվության համաձայն՝ Ընկերության անվամբ ապրանքների և ծառայությունների միջազգային դասակարգման (ԱԾՄԴ) 32-րդ դասում (սեղանի ջուր) ազգային ընթացակարգով գրանցվել և Հայաստանի Հանրապետությունում իրավական պահպանություն են ստացել հետևյալ ապրանքային նշանները.

1. 2019 թվականի դեկտեմբերի 11-ին (գրանցման հերթական համար՝ թիվ 29997) «ԱՊԱՐԱՆ ԶՈՒՐ ՍՊԸ ԱՂԲՅՈՒՐ ՇՇԱԼՑՎԱԾ Է ԶՐԵՐԻ ՄԱՅՐԱՔԱՂԱՔ ԱՊԱՐԱՆՈՒՄ ՉԳԱԶԱՎՈՐՎԱԾ 19Լ APARAN CITY SINCE 1828» համակցված ապրանքային նշանը, որում բացի «ԱՂԲՅՈՒՐ» և ««ԱՊԱՐԱՆ ԶՈՒՐ» ՍՊԸ» գրառումներից մնացած բոլոր բառային տարրերը և թվերն ինքնուրույն պահպանության օբյեկտներ չեն: Նշված ապրանքային նշանը պահպանվում է սպիտակ, մուգ կապույտ, կարմիր և բաց մոխրագույն գունային համակցությամբ,

2. 2019 թվականի դեկտեմբերի 11-ին (գրանցման հերթական համար՝ թիվ 30032) «ԱՂԲՅՈՒՐ ԱՊԱՐԱՆ ԶՈՒՐ ՍՊԸ ԱՄԻՍՈՒՄ ԱՊԱՐԱՆ ԴՋՄՍ ՕՕՕ» համակցված ապրանքային նշանը, որում բացի «ԱՂԲՅՈՒՐ» «ԱՄԻՍՈՒՄ» և ««ԱՊԱՐԱՆ ԶՈՒՐ» ՍՊԸ» գրառումներից մնացած բոլոր բառային տարրերը և թվերն ինքնուրույն պահպանության օբյեկտներ չեն: Նշված ապրանքային նշանը պահպանվում է սպիտակ, կապույտ, կարմիր և բաց մոխրագույն գունային համակցությամբ,

3. 2020 թվականի փետրվարի 24-ին (գրանցման հերթական համար՝ թիվ 30404) «ԱՂԲՅՈՒՐ AGBYUR APARAN DJUR» համակցված ապրանքային նշանը, որում բացի «ԱՂԲՅՈՒՐ», «AGBYUR» և ««ԱՊԱՐԱՆ ԶՈՒՐ» ՍՊԸ» գրառումներից մնացած բոլոր բառային տարրերը և թվերն ինքնուրույն պահպանության օբյեկտներ չեն: Նշված ապրանքային նշանը պահպանվում է սպիտակ, կապույտ, կարմիր և բաց մոխրագույն գունային համակցությամբ:

5. Գործի բազմակողմանի, լրիվ և օբյեկտիվ քննարկման արդյունքում Հանձնաժողովը հաստատված է համարում հետևյալ փաստական հանգամանքները.

1. Ընկերության կողմից իրացվող շաղկապ ջրի պիտակների վրա՝ ձախ հատվածում առկա են «խմելու ջուր չգազավորված. Ապարանի կենտրոնական ջրամատակարարման ցանցի ջուր մաքրված, ֆիլտրված», իսկ պիտակների կենտրոնական հատվածում՝ «ԱՂԲՅՈՒՐ» մակնշումները:

2. Ընկերության անվամբ առկա են թիվ 29997, թիվ 30032 և թիվ 30404 գրանցման համարներով ազգային ընթացակարգով գրանցված համապատասխանաբար «ԱՊԱՐԱՆ ԶՈՒՐ ՍՊԸ ԱՂԲՅՈՒՐ ՇՇԱԼՑՎԱԾ Է ԶՐԵՐԻ ՄԱՅՐԱՔԱՂԱՔ ԱՊԱՐԱՆՈՒՄ ՉԳԱԶԱՎՈՐՎԱԾ 19Լ APARAN CITY SINCE 1828», «ԱՂԲՅՈՒՐ ԱՊԱՐԱՆ ԶՈՒՐ ՍՊԸ ԱՄԻՍՈՒՄ ԱՊԱՐԱՆ ԴՋՄՍ ՕՕՕ» և «ԱՂԲՅՈՒՐ AGBYUR APARAN DJUR» համակցված ապրանքային նշանները, որոնցում «ԱՂԲՅՈՒՐ» բառին տրված է ինքնուրույն իրավական պահպանություն:

6. Վարույթի փաստական հանգամանքների և վերաբերելի իրավական նորմերի ուսումնասիրության և վերլուծության արդյունքում Հանձնաժողովը եզրահանգում է հետևյալին.

«Տնտեսական մրցակցության պաշտպանության մասին» օրենքի (այսուհետ նաև՝ **Օրենք**) 16-րդ հոդվածի 1-ին մասի համաձայն՝ անբարեխիղճ մրցակցություն է համարվում տնտեսավարող սուբյեկտի ցանկացած գործողություն կամ վարքագիծ, որը հակասում է սույն օրենքին, այլ օրենքներին, նորմատիվ իրավական ակտերին կամ գործարար շրջանառության սովորույթներին, խախտում է տնտեսավարող սուբյեկտների միջև կամ վերջիններիս ու սպառողների կամ ձեռք բերողների միջև բարեխղճության՝ ազնվության, արդարության, ճշմարտության և (կամ) անաչառության սկզբունքները:

Օրենքի 16-րդ հոդվածի 2-րդ մասի համաձայն՝ անբարեխիղճ մրցակցությունն արգելվում է:

Օրենքի 16-րդ հոդվածի 4-րդ մասի համաձայն՝ Օրենքի 16-24-րդ հոդվածներում նկարագրված իրավախախտումների հատկանիշների առկայության հարցը գնահատում է Հանձնաժողովը:

Օրենքի 21-րդ հոդվածի 1-ին մասի համաձայն՝ անբարեխիղճ մրցակցություն է համարվում հասարակության մոլորեցումը, այդ թվում՝

1) ցանկացած գործողություն կամ վարքագիծ, որը մոլորեցնում է կամ կարող է մոլորեցնել հասարակությանը տնտեսավարող սուբյեկտի, նրա գործունեության կամ առաջարկած ապրանքների, դրանց գովազդմանը, տարածմանը կամ իրացմանը նպաստող միջոցառումների, ապրանքի աշխարհագրական ծագման կամ Օրենքի 20-րդ հոդվածում թվարկված բնութագրերի կամ պայմանների վերաբերյալ.

2) ապրանքների որակն անհիմն չափազանցելը կամ որակի, քանակի կամ այլ բնութագրերի կամ ապրանքների ձեռքբերման կամ իրացման վերաբերյալ համապատասխան տեղեկատվություն չհիշատակելը կամ տեղեկատվությունն այն ձևով ներկայացնելը, որը կարող է հանգեցնել թյուր տպավորության ստեղծման (ապակողմնորոշման).

3) գովազդի մեջ (գովազդելու ընթացքում) կամ իրացման ընթացքում թերի կամ կեղծ կամ ոչ լիարժեք տվյալների (տեղեկությունների) նշումը կամ այնպիսի տվյալների (տեղեկությունների) բացակայությունը կամ տվյալների (տեղեկությունների) այն ձևով նշումը, որն սպառողին հնարավորություն չի տալիս ամբողջական պատկերացում կազմելու իրացվող կամ գովազդվող ապրանքի կամ տնտեսավարող սուբյեկտի վերաբերյալ.

4) օրենքին հակասող, այդ թվում՝ անբարեխիղճ կամ հակաօրինական կամ հավաստիության կամ պատշաճության խախտմամբ իրականացվող գովազդները, որոնք կարող են կանխել, սահմանափակել կամ արգելել տնտեսական մրցակցությունը կամ վնասել սպառողների շահերը:

Սույն գործով վարույթը հարուցվել է Ընկերության կողմից առանց ջրօգտագործման թույլտվության և աղբյուրի ջրի ձեռքբերման «աղբյուրի ջուր» մականշումով շշալցված խմելու ջուր արտադրելու և իրացնելու միջոցով հասարակության մոլորեցման դրսևորմամբ առերևույթ անբարեխիղճ մրցակցության հատկանիշներով, մասնավորապես, Ընկերության կողմից արտադրվել և իրացվել է «խմելու չգազավորված ջուր ԱՂԲՅՈՒՐ» մականշումով շշալցված ջուր:

Վարույթի շրջանակներում պարզ է դարձել, որ Ընկերության անվամբ թիվ 29997, թիվ 30032 և թիվ 30404 գրանցման համարներով ազգային ընթացակարգով գրանցվել և Հայաստանի Հանրապետությունում իրավական պահպանություն են ստացել համապատասխանաբար «ԱՊԱՐԱՆ ԶՈՒՐ ՍՊԸ ԱՂԲՅՈՒՐ ՇՇԱԼՑՎԱԾ Է ԶՐԵՐԻ ՄԱՅՐԱՔԱՐԱՔ ԱՊԱՐԱՆՈՒՄ ՉԳԱԶԱՎՈՐՎԱԾ 19Լ APARAN CITY SINCE 1828», «ԱՂԲՅՈՒՐ ԱՊԱՐԱՆ ԶՈՒՐ ՍՊԸ AXΠOP AΠAPAH ΔΪΨΡ ΟΟΟ» և «ԱՂԲՅՈՒՐ AGBYUR APARAN DJUR» համակցված ապրանքային նշանները, որոնցում «ԱՂԲՅՈՒՐ» բառին տրված է ինքնուրույն իրավական պահպանություն:

Հայաստանի Հանրապետության քաղաքացիական օրենսգրքի 1172-րդ հոդվածի 1-ին մասի համաձայն՝ ապրանքային նշանի իրավատերը բացառիկ իրավունք ունի տիրապետելու, օգտագործելու և տնօրինելու ապրանքային նշանը, ինչպես նաև այլ անձանց թույլատրելու կամ արգելելու դրա օգտագործումը:

«Ապրանքային նշանների մասին» օրենքի 17-րդ հոդվածի 1-ին մասի համաձայն՝ սույն հոդվածի իմաստով ապրանքային նշանի օգտագործում է համարվում՝

1) դրա զետեղումն այն ապրանքների վրա, որոնց համար գրանցված է ապրանքային նշանը, կամ դրանց փաթեթավորման վրա.

2) դրա կիրառումը գովազդներում, հրատարակություններում, պաշտոնական ձևաթղթերում, ցուցանակներում միայն այն դեպքերում, երբ ապրանքների կամ դրանց փաթեթավորման վրա նշանի կիրառումն անհնար է.

3) սույն մասի 2-րդ կետում նշված գործողությունների կատարումը ծառայությունների համար:

Ընկերությունն իր կողմից արտադրվող և իրացվող ջրի պիտակների վրա օգտագործում է «ԱՂԲՅՈՒՐ» գրառումը՝ հանդիսանալով թիվ 29997, թիվ 30032 և թիվ 30404 գրանցման համարներով գրանցված ապրանքային նշանների իրավատերը:

Հետևաբար, Հանձնաժողովը գտնում է, որ որպես թիվ 29997, թիվ 30032 և թիվ 30404 հերթական համարներով գրանցված ապրանքային նշանների իրավատեր՝ Ընկերության վարքագծում տվյալ դեպքում «ԱՂԲՅՈՒՐ» բառի օգտագործման կապակցությամբ հասարակության մոլորեցման դրսևորմամբ անբարեխիղճ մրցակցության հատկանիշներ առկա չեն:

Օրենքի 89-րդ հոդվածի 1-ին մասի 2-րդ կետի համաձայն՝ տնտեսական մրցակցության բնագավառում իրավախախտման վերաբերյալ վարույթը ենթակա է կարճման, եթե առկա է վարույթի հարուցումը մերժելու որևէ հիմք:

Օրենքի 80-րդ հոդվածի 1-ին մասի 1-ին կետի համաձայն՝ տնտեսական մրցակցության բնագավառում իրավախախտման վերաբերյալ վարույթի հարուցումը ենթակա է մերժման, եթե բացակայում է խախտման դեպքը:

Այսպիսով, Հանձնաժողովը գտնում է, որ Ընկերության կողմից հասարակության մոլորեցման դրսևորմամբ անբարեխիղճ մրցակցության իրավախախտման դեպքը բացակայում է, ուստի թիվ ՀԳ-00048/22 վարույթը ենթակա է կարճման:

6. Եզրափակիչ մաս.

Հիմք ընդունելով վերոգրյալը և ղեկավարվելով Օրենքի 90-րդ հոդվածի 1-ին մասի 3-րդ կետով, 67-րդ հոդվածի 2-րդ մասով և «Վարչարարության հիմունքների և վարչական վարույթի մասին» օրենքի 70-րդ և 71-րդ հոդվածներով, Հայաստանի Հանրապետության վարչական դատավարության օրենսգրքի 72-րդ հոդվածի 1-ին մասի 1-ին կետով՝ Հանձնաժողովը

Ո Ր Ո Շ Ե Ց

1. Կարճել թիվ ՀԳ-00048/22 վարույթը:
2. Սույն որոշումն ուժի մեջ է մտնում դրա պատճենը «Ապարան Զուր» սահմանափակ պատասխանատվությամբ ընկերությանը հանձնելուն հաջորդող օրվանից:
3. Սույն որոշումը կարող է բողոքարկվել վարչական կամ դատական կարգով՝ ուժի մեջ մտնելու պահից երկամսյա ժամկետում:

ՆԱԽԱԳԱՀԻ ՊԱՇՏՈՆԱԿԱՏԱՐ

2022 թ. մայիսի 3

Երևան

